

RJEŠENJE
o odbijanju Zahtjeva za odlaganje izvršenja konačnog Rješenja Konkurencijskog
vijeća broj: 05-26-1-023-21-II/12 od dana 6. marta 2013. godine

Sarajevo
mart, 2013. godine

Broj: 05-26-1-023-30-II/12
Sarajevo, 18.03.2013. godine

Na osnovu člana 25. stav (1) tačka e), člana 42. tačka 2) Zakona o konkurenciji („Službeni glasnik BiH“, br. 48/05, 76/07 i 80/09), člana 18. st. 2. i 3. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10), a rješavajući po Zahtjevu za odgađanje izvršenja konačnog Rješenja broj: 05-26-1-023-21-II/12 od 06.03.2013. godine, podnesenog od privrednog subjekta B.S.A. d.d. 33 avenue du Maine-Tour Maine Montparnasse, 75015 Pariz, Francuska putem njegovog povezanog društva koje je registrovano i posluje na tržištu Bosne i Hercegovine, Dukat mljekara d.o.o. Željeznička bb, 76250 Gradačac, Konkurencijsko vijeće na 56. (pedesetšestoj) sjednici održanoj dana 18.03.2013. godine, donijelo je

R J E Š E N J E

1. Odbija se Zahtjev za odgađanje izvršenja konačnog rješenja Konkurencijskog vijeća broj: 05-26-1-023-21-II/12 od 06.03.2013. godine, podnesen od privrednog subjekta B.S.A. d.d. 33 avenue du Maine-Tour Maine Montparnasse, 75015 Pariz, Francuska, kao neosnovan.
2. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko distrikta Bosne i Hercegovine.

O b r a z l o ž e n j e

Konkurencijsko vijeće je dana 14.03.2013. godine pod brojem: 05-26-1-023-28-II/12 zaprimilo Zahtjev za odgađanje izvršenja konačnog rješenja Konkurencijskog vijeća broj: 05-26-1-023-21-II/12 od 06.03.2013. godine (u daljem tekstu: Zahtjev), podnesenog od privrednog subjekta B.S.A. d.d. 33 avenue du Maine-Tour Maine Montparnasse, 75015 Pariz, Francuska (u daljem tekstu: B.S.A.) putem njegovog povezanog društva koje je registrovano i posluje na tržištu Bosne i Hercegovine, Dukat mljekara d.o.o. Željeznička bb, 76250 Gradačac (u daljem tekstu: Podnosilac zahtjeva ili Dukat mljekara), sa potvrdom o podnesenoj Tužbi (upravni spor broj: S1 3 U 012665 13 Fp od 14.03.2013. godine) koja je izdana od strane Suda Bosne i Hercegovine kao i primjerkom podnesene tužbe.

U navedenom Zahtjevu, a u skladu sa članom 18. Zakona o upravnim sporovima Bosne i Hercegovine, Podnosilac zahtjeva je istakao prijedlog za odgađanje izvršenja konačnog rješenja Konkurencijskog vijeća, broj: 05-26-1-023-21-II/12 od 06.03.2013. godine (u daljem tekstu: Rješenje) odnosno odgađanje prinudnog izvršenja novčane kazne, do konačne sudske odluke.

Podnosilac zahtjeva u podnesenom Zahtjevu u bitnom navodi:

- da bi se udovoljavanjem sadržaju Zahtjeva ispoštovao postavljeni zahtjev prema članu 18. Zakona o upravnim sporovima BiH, odnosno, da odgađanje izvršenja konačnog Rješenja nije protivno javnom interesu, niti bi se njime nanijela veća nenadoknativa šteta.
- da je u tački 2. dispozitiva Rješenja izrečena novčana kazna privrednom subjektu B.S.A u visini od 310.000,00 KM (tristotineidesethiljada) zbog nepodnošenja Prijave koncentracije u zakonom propisanom roku, a koju je dužan platiti u roku od 8 dana od dana prijema istog i koja za sobom povlači mogućnost prinudne naplate;

- da je dana 14.03.2013. godine podnio tužbu Sudu Bosne i Hercegovine protiv Rješenja i zatražio poništenje tačke 2. Rješenja i odgodu prinudnog izvršenja istog do konačne odluke suda;
- da bi se odobrenjem odgode izvršenja ispoštovao pravni poredak u dijelu poslovanja privrednih subjekata sa velikim finansijskim investicijama u BiH, kao i član 18. Zakona o upravnim sporovima, za što su ispunjeni svi zakonski uslovi;
- da je privredni subjekt B.S.A. u Bosnu i Hercegovinu putem svojih povezanih društava (Dukat mljekara i Inmer d.o.o. Gradačac) od 2007. godine do danas uložio (**)¹ miliona EUR, te da će nastaviti sa ulaganjima, stoga je izricanje tako stroge kazne iz ovih razloga nepravično.

Prema članu 18. stav (2) Zakona o upravnim sporovima Bosne i Hercegovine nadležna institucija može odložiti izvršenje pobijanog konačnog upravnoga akta do konačne sudske odluke ako bi izvršenje nanijelo tužiocu štetu koja bi se teško mogla popraviti, a odgađanje nije protivno javnom interesu niti bi se njime nanijela veća nenadoknativa šteta protivnoj stranci, a prema stavu 3. istog člana nadležna institucija može i iz drugih razloga odgoditi izvršenje pobijanog konačnog upravnog akta do konačne sudske odluke, ako to javni interes dozvoljava.

Odlučujući po Zahtjevu, Konkurencijsko vijeće je utvrdilo da sem navoda da odgađanje prinudnog izvršenja Rješenja nije u suprotnosti sa javnim interesima, niti bi se njime nanijela veća nenadoknativa šteta, Podnosilac zahtjeva ne iznosi nikakve druge bitne i/ili odlučujuće činjenice ili dokaze koji potkrepljuju te navode. Navodi Podnosioca zahtjeva u pogledu dosadašnjih ulaganja u Bosnu i Hercegovinu nisu uzeti u obzir, jer ne predstavljaju relevantne činjenice za donošenje odluke u smislu člana 18. Zakona o upravnim sporovima BiH.

Nenadoknativu štetu koja bi se izvršenjem Rješenja nanijela Podnosiocu zahtjeva, a koja je zapravo preduslov za donošenje tražene odluke, Podnosilac zahtjeva ni ne pominje, niti je u tom smislu ponudio ikakve dokaze (finansijsku dokumentaciju na osnovu koje bi se utvrdilo štetno djelovanje izrečene novčane kazne za B.S.A. ili sl.).

Obzirom da izrečena novčana kazna od 310.000,00 KM (tristotineidesethiljada) predstavlja (**)% ukupnog prihoda B.S.A. za 2011. godinu koji iznosi (**) KM, a da je za učinjenu povredu Zakonom o konkurenciji zapriječena kazna do 1% od ukupnog prihoda, to znači da je maksimalna novčana za privredni subjekt B.S.A. mogla iznositi i do (**) KM. Konkurencijsko vijeće time nije pronašlo ni druge razloge u smislu člana 18. stav (3) Zakona o upravnim sporovima, niti je Podnositelj zahtjeva na njih ukazao.

Imajući u vidu navedeno, Konkurencijsko vijeće je odlučilo kao u dispozitivu ovog Rješenja.

Pouka o pravnom lijeku

Protiv ovog Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Rješenja.

Predsjednica

Gordana Živković

¹ (**) – podaci predstavljaju poslovnu tajnu